


TEZAUUR LITURGIC
4 FEBRUARIE

SLUJBA
SOBORULUI
SF.NOI MUCENICI
ȘI MĂRTURISITORI
AI
KLINSKULUI



MOSCOVA, 2000



Собор новомучеников и исповедников Клинских

На Велицей вечерни

На Господи воззвах, стихиры праздника 3,
и новомученикам—5, гл.5, подобен «Радуйся»:

Радуйтесь, новомученицы Клинстии! /
Упование на Господа возложивше, / лютую
смерть от безбожных претерпесте /
Сладчайшаго ради Иисуса, / не убоястеся от
убивающих тело, / лишше же что не могущих
сотворити, // сего ради нарекоствеся чада
Христова.

Радуйтесь, стражие небеснии земли нашея! /
День от дне в заточении мучемии, / ночь же от
нощи сна лишаемии, / от лукавых человек
притворно вопрошаемии, / утесняемии и
устрашаемии, / за всеми же сими беззаконно
убиваемии, / верни в любви ко Господу
пребывше, / Царствия венцы уллучили есте, //
на небеси и на земли прославляемии друзи
Христовы.

Радуйтесь, новии исповедницы Клинстии! / В
скорбех и страданиях ваших / чающе

избавления от Господа, / не пеклися есте, како или что отвещавати, / или что рещи, вопрошаеми, / от Духа же Свята научени бысте, / яже подобает рещи безбожным: / нимало не согласилися есте лжи оклеветающих, / но Сына Божия исповедали яве пред человеки, / сего ради и Христос нарече вы во Царствии Своем // равныя ангелом сыны воскресения.

Радуйтесь, доблии наши сродницы, / священнии мученицы Петре и Алексие / купно с преподобномучеником Серафимом! / Созовите в день памяти вашей, / вся Клинския новомученики и исповедники / моление соборное составить / о чадах ваших, zde предстоящих и молящихся, / память вашу днесь верно совершающих, / Господа прославляющих вас прославившаго, // и молитвами вашими нас спасающаго.

Радуйтесь, Клина новии мученицы, / священницы, монаси и мирстии, / мужие и жены, / веру сохраниши в годину страшную, / Церкви Православныя утверждение и похвало, / просиявши яко солнце во Царствии Отца Небеснаго, // яко страданьми за Христа праведницы явистесь.

Слава, гл. 6:

Кую песнь воспоим Господеви, / память
совершающе новых мучеников земли нашея? /
Кую похвалу принесем образную их подвигом?
/ Кое ли слово не обличит нашего
недостойнства? / Со дерзновением воскликнем
же, братие: / молитвами Тебе ради
пострадавших / спаси, Господи, люди Твоя, //
сборную их память днесь совершающих.

И ныне, праздника.

Вход. Прокимен дне. Чтения новомучеников.

(см. службу Собору новомучеников и
исповедников Российских).

На литии, стихиры, гл. 8.

Страстоносцы преславнии, / подвигом добрым
подвизастесь, / правды ради и кротости
пострадавшии, / течение скончаше, / земного
жительства лишении, / верою взыскасте
основания имущаго града, / емуже художник и
содетель Бог, / граждане небеснии явились. /
Поминайте нас, память вашу празднующих, //
и молитесь спастися душам нашим.

Клина града цвети духовнии, /
терпеливодушнии мученицы, / аще и безвестно

погребена быша телеса ваша, / душами ныне
Всеведцу предстоите, / Церкви Христовой
явлени есте. / Лобызаем образы ваши
преславныя, / благочестно соборную память
вашу совершаем, // и молим спастися душам
нашим.

Слава, гл. 6.

Небеснии наши хранителие и молитвенницы, /
кровьми вашими восход спасительный
совершивше, / небесная славная дарования
прияли есте / от руки Судии Праведнейшаго. /
Безмезднии врачеве душ и телес наших, /
поминайте нас, страдания ваша поминающих,
// и молитесь спастися душам нашим.

И ныне, праздника.

На стиховне стихиры праздника,

Слава, новомучеником, гл. 4:

Непрестанно гоними и преследуеми, / окружени
скорбьми и злохуленьми, / с места на место
преходяще, / подражатели Христовы явистесь, /
новомученицы Клинстии. / Терпением души
ваша стяжавше, / смертная же страдания
приемше, / достигли есте Царствия Небеснаго,
// молятся присно о душах наших.

Ины стихиры, новомучеников, гл. 2,

подобен «Доме Евфрафов»

Земле Клинская / днесь память совершает, /
сонма новомучеников своих, / собравшись в
Дому Божиим / единомышлением.

Стих: Господи, Господь наш, / яко чудно Имя
Твое по всей земли.

Нивы Господней пределов Клинских /
стократное приношение, / чада Христовы Петр
и Серафим со Алексием / купно с братьями и
сестрами прославленнии // ныне во славе
небесней на земное отечество милостивно
взирают.

Стих: Святым, иже суть на земли Его, / удиви
Господь вся хотения Своя в них.

Соборе святых пастырей Клинских, / заповедь
Христову до конца исполнивше, / души за чада
духовныя положили есте. / Умолите Судию
Всемилоствиваго о земном отечестве вашем // и
о паствы вашей наследницех.

Слава, глас и подобен той же.

Новый Доме Евфрафов, / небесныя
избранницы, / возвеселитесь ныне, / о земном

отечестве вашем, // и веру православную в нем утвердите.

И ныне, глас 8, подобен «О, преславнаго чудесе»

О, преславнаго чудесе! / Во пророцех предуведенное ныне исполняется, / яко от мертвых воскресает Отечество наше, / и в немощех наших сила Божия совершается: / православная вера расцветает, / храмы святых из руин возстают, / новомученицы российстии прославляются, / и народ ко истинней вере возвращается, / и Христос от всех величается, / зима безбожия истаевает, / и лето Господне приятно к нам вновь приходит / молитвами святых, за веру пострадавших, / наипаче же предстательством Пречистыя Владычицы нашея Богородицы // и Приснодевы Марии.

Тропарь новомучеников, гл. 4

Первопрославленнии святии Клинския земли, / новомученицы и исповедницы ея, / в годину безбожную за Христа пострадавшии / и до смерти верни Ему пребывшии, / в небесней славе ныне ликуют, блаженнии, / и молятся о земнем отечествии своем // и спасении душ наших.

На Утрени

По 1-м стихословии, Седален, гл. 1:

Новомученицы Клинстии, / рцыте нам, како в темницах воспевасте: / «На Тя, Господи, уповахом, да не постыдимся во веки». / Рцыте нам, како смерти лютыя не убоястесь, / како помощь Вышняго победисте врага и местника, / како вкушаете ныне манну сокровенную / и плоды древа жизни посреде рая Божия. / Научите нас, обнищавших верою, // да последуем стопам вашим.

Слава, и ныне, праздника.

По 2-м стихословии, Седален, гл. 7:

Преподобномученицы Акатовския, / Анастасие, Екатерино и Александро, / купно с сестрами вашими о Господе / по всей земли нашей на страдания безбожными разсеянныя, / ныне же во обителех небесных совокупльшиися / и вечныя жизни наслаждающияся, / услышите нас, память вашу днесь совершающих, // и молитесь о душах наших.

Слава, и ныне, праздника.

По полиелее, Седален, гл. 5.

Пастырие духовнии, / стадо Христово добре
упасшии / и от раскола погибельнаго паству
Клинскую сохраншии, / за верность преданию
Церкви Православныя, / преданы бысте в
темницы и на мучения, / ведоми ко властем и
владыкам, / да мнимозаконно умертвят вы, / во
еже разрушити Православие на Раси. / Не
ведаша бо гонители безумнии, / ни Писания, ни
силы Божия: // не одолеют бо врата адова
Церковь Христову.

Слава, и ныне, праздника.

Прокимен новомучеников, гл. 4: Проидохом
сквозе огонь и воду, / и извел ны еси в покой.
Стих: Разжегл ны еси, якоже разжизается
сребро. Евангелие от Матфея, зачало 36.

По 50-м псалме, стихира, гл. 6.

Отца Безначальнаго чада возлюбленная, / Сына
Единороднаго друзи истиннии, / Духа Святаго
сосуди избрании, / новомученицы земли нашея,
/ Бога прослависте в телесех ваших, / ихже
пройде оружие смертное, / яко жертва чистая
принесостесь Святей Троице, // и ныне молятся
о душах наших.

**Канон праздника со ирмосом на 4, и канона
два новомучеником, на 8.**

Канон новомучеников 1-й, глас 8.

Песнь 1

Ирмос: Поим Господеви, проведенному люди Своя сквозе Чермное море, яко Един славно прославися.

Новомученицы Клинстии, удела Божия людие избранныи, царское священство, кую песнь празднственную ныне воспоем о вас Господеви, Един бо славно прославися.

Огустеша волны моря житейского, внегда шествовати вам путем крестным; воинство же фараонитское мгла вечная покры, внегда восходити вам во обители света невечерняго, идеже ныне пение хвалебное приносите Господеви, Един бо славно прославися.

Владыки Едомския новыя и князи Моавитския беззаконныя страх и трепет постиже, егда видеша даже до смерти верность вашу Господеви, святии мученицы, Той бо Един в вас славно прославися.

Богородичен: О, Всепетая Мати! Не презри грешных молений гласы, но с мученицами новыми умоли о нас Сына Твоего водворитися купно с ними в уготованном жилищи святыни Его, Един бо славно прославися.

Ин канон, глас тойже, те же и ирмосы.

Песнь 1

В скорбное время гонения безбожного не утрашился еси прещений и преследований князей века сего, Петре священномучениче, Троицкаго села окормителю, но добре упасл еси стадо Христово, в чадах духовных веру утверждая, и в домех, и в храме непрестанно убеждая их пребывати внутри спасительнаго ковчега – Церкви Православныя, вне же Ея море погибельное фараона мысленнаго.

Апостолу первоверховному тезоименитый, сему уподобился еси, агнцы Христовы на пажити верности Богу изводя и пред ними усердно шествуя, сего ради восприял еси и славную кончину онаго, во исполнения вящшей заповеди: ты по мне гряди.

Проповедию о мире Христовом злобу мира сего обезсилл еси, Петре священнейший, и четыредесятилетное служение алтарю Господню безпорочно исполнив, яко пустынное шествие среди гонений и уз темничных совершил еси, не в землю обетования, но в самое Небесное Царствие восшел еси, венцем мученическим увенчанный и в Церкви Божией прославленный.

Богородичен: К Пречистей Богоматери молитвенное воздыхание усердно принесем, да сподобит и нас, недосойных, блаженной части Царствия Сына Своего.

Песнь 3

Ирмос: Утверждаей в начале небеса разумом, и землю на водах основавый, на камени мя Христе заповедей Твоих утверди, яко несть свят, паче Тебе, Едине Человеколюбче.

Миру якоже отребие вменистеса, святии новомученицы, поносими и оклеветаеми Господа ради, велия радования исполнястеса, многу мзду на небесех провидяще и вопиюще: несть свят паче Тебе, Господи!

Утвердися в Бозе сердце твое, Петре священномучениче, града Клина похвало и собора святых его возглавителю, апостольскою бо ревностию преукрашен, стадо Христово добре упасл еси, душу свою за овцы полагая и взывая: несть свят паче Тебе, Господи!

Человече Божий Петре досточудне, Единому Владыце дванадесятолетное служение благочиннаго принесл еси, адаманте веры несокрушимый, казнь лютую от безбожных

приял еси, и по смерти возвещаеши: несть свят паче Тебе, Господи!

Богородичен: Едина Чистая, Едина Благословенная, благословила еси смиренного угодника Божия Петра на служение во храме Твоем, всем скорбящим от безбожных радость сотворяющи, не лиши и нас Покрова Твоего, но возстави пети: несть свят паче Тебе, Господи!

Ин.

Милосердствуя о страждущем народе Божиим, Сергие священ-номучениче, посещал еси жен немощных в непосильных трудехпробывавших, участием и словом укрепляя веру их, добрый пастырю Христов.

Прроповедию о милости Божией утешал еси заблудших чад стада Христова, сего ради возненавиден был еси служителями тьмы века сего, и от них в темницу ввержен, и жизнь и смертью своею прославил Бога.

От лжесвидетелей оклеветанный, паче всякаго железа крепчайший духом показался еси, пастырю Николо-Железовский, аще и пятидневно истязуемый непрестанно, и советом нечестивых безвинно осужденный. Смертью же своею зубы львов зловерных сокрушил еси,

непобедимую благодатию Божиею осененный кроткий служителю Христов.

Богородичен: Мати Дево Всемиловитвая!
Святыми молитвами Твоими умягчи
окаменевшая сердца наша да возможем и мы
милосердовать о ближних наших, и да
помиловании будем по слову Сына Твоего.

Кондак и икос праздника.

Седален мученикам, глас 5

Благословени есте, Господни мученицы, цвети
благоуханныи земли нашея, невечерняго света
причастницы и славы Божественныя
восприемницы! Молите непрестанно
Благосердаго Владыку ущедрити и спасти души
наша.

Слава и ныне, праздника

Песнь 4

Ирмос: Ты моя крепость, Господи, Ты моя и
сила, Ты мой Бог, Ты мое радование, не оставль
недра Отча и нашу нищету посетив, тем с
пророком Аввакумом зову Ти: силе Твоей слава
Человеколюбче.

Ныне отпускаеши рабы Твоя, Владыко, по глаголу Богоприимца Твоего, ко оному блаженному покою; ныне собирается пшеница в житницу Господню, скорбьми от плевел очищенная, ныне плоду созревшему серп посылается, – новии мученицы в веселии зываху, – яко слышим слух Твой, и разумеем дела Твоя, и прославляем премудрость Твою, Человеколюбче.

Инок от юности пребыл еси славныя Лавры Александро-Невския, новый воин Христов явился еси, суеты мира сего отвергшеся, преподобномучениче Серафиме. Богоотступниками от столиц изгнанный, притекл еси ко граду нашему и обрел тамо святого Петра пастыря, емуже неразлучно даже до кончины сослужил еси, благодаряще Господа: смотрению Твоему слава, Человеколюбче.

Клина града прославление, Церковь Христова тобою украсися, преподобномучениче, ангелом небесным уподобился еси, мучителем безбожным посрамление и вечное осуждение быв, яко не прияша, Клинский Серафиме, свидетельства твоего: силе Твоей слава, Человеколюбче.

Богородичен: О преславнаго чудесе! Небесе и земли Царица избранных служителей Своих

Петра и Серафима во единый день раеви сподобила еси, уготованныя славы венцы возлагая сим, взывающим: Царствию Твоему слава, Человеколюбче.

Ин.

Купли житейския изведав, служение сим оставил еси, богомудре Алексие священномучениче, ко служению церковному притекл еси, и талант приемши бытии верным Христу, Тому усердно последовал, и куплю истинную совершив, приобрел еси един многоценен бисер Царствия Нетленного.

Соблазны мира сего отвергг еси, священномучениче Алексие, Успенскаго храма усердный служителю, и собрания татей церковных, учинявших раскол, обличил, богомудре, и верность Церкви патриаршей сохранил еси, темничнаго заключения нимало не смущаясь, и вся ради Христа претерпел еси.

Трикратное темничное заключение и изгнания многолетняя смиренно подъял еси, блаженнее Алексие, и в крае северном течение верно скончав, в руце Отца Небеснаго душу свою предал еси, и Судии Всемилоостивейшаго услышал еси глас: «Вниди в радость Господа Твоего, рабе Мой верный» .

Богородичен: Ублажаем Тя, Всеблаженная, Богородице Приснодево, и молим Тя прилежно, умоли Сына Твоего и Господа нашего, да наставит нас благодатию Своею со страхом Божиим и верою прейти стезю жизни нашея и сподобиться Царствия Его.

Песнь 5

Ирмос: Просвети нас повелении Твоими, Господи, и мышцею Твоею высокою, Твой мир подаждь нам Человеколюбче.

Мир Божий, иже паче всякаго ума, в сердцах ваших ношасте, Свет во откровение языков, иже паче всякаго света зрясте, славу людей Божиих вовеки восприясте, сродницы наши духовнии, сладость Христову вечную вкушаете, блаженнии, поюще: разве Тебе инаго Бога не вемы.

Клинстей земли явился еси украшение, Алексие священниче: тридесять лет во едином храме непорочное служение совершая, и Правду Божию возвещая на земли, небеснаго отечества достигл еси, праведне. От лжесвидетелей оклеветанный, служителями тьмы века сего осужденный, умерщвлен был еси злодеями во един день с собратиями твоими Петром и Серафимом, с нимиже ныне всех Владыке

сладко возглашаеши: разве Тебе, Христе, инаго Бога не вемы.

Ликостояния блаженных сподобился еси, священне Алексие, на земли бо воздвизая руки горе в предстоянии претолу Божию храма Крестовоздвиженскаго, созерцал еси умно славу страстей Христовых, и о сей единой ревновал еси. Сего ради и Господь воздвиже тя во свидетельство пред властями нечестивыми исповедати силу крестную и веру истинную, яко разве Христа инаго Бога не знал еси.

Богородичен: Иверия славится и Казань веселится, Тихвин умиляется и Почаев ликует, Владимир красуется и Смоленск торжествует, ликами чудотворными Твоими, Пресвятая, украшени. Ныне же и град Клин, аще и малый в братии своей, не отлучен есть Твоя милости, Всечистая – имейя бо чудный образ Твой, новомучениками своими воспеваает Ти: разве Сына Твоего инаго Бога не вемы.

Ин.

Многотрудную жизнь мирскаго служения прешед, священномучениче Иоанне, напоследок призван был еси от всевидящаго Бога на служение церковное, яко пришедый во единонадесятый час, нимало не смущаясь

временам гонений пришедшим, со всеусердною ревностию труды пастырския подял еси, словом и делом, и самым обличем своим благолепным вверенную ти паству наставлял еси, научая богобоязненному исполнению заповедей евангельских.

Многократно премещаемый от священноначалия, во еже избавити тя от преследований врагов Церкви Божией, с радостию принимал еси всякое новое служение, предзрев Господа выну одесную себе, надежду полагая на Его крепкую десницу, и всюду пребывал еси яко свеща горящая на свещнике Христовом.

Егда прииде исполнения времени жизни твоея, неколебиме Иоанне, по слову псалмопевца семидесятолетное, заключен был еси в темницу от бебожных, и оклеветанный от лжесвидетелей, осужден был яко повинный смерти. Обаче за пределом жизни временныя провидел еси жизнь истинную и вечную, и с несумненною верою и надеждою воскресения, в Царствие Света Невечерняго восшел еси, венцем мученическим увенчанный.

Богородичен: Моливами Пречистыя Твоея Матери и святых новомучеников Клинских,

Господи Иисусе Христе Боже наш, избави нас от лукаваго ловления тьмы века сего сподоби деснаго предстояния при страшнем и славнем пришествии Твоем.

Песнь 6

Ирмос: Молитву пролию ко Господу, и Тому возведу печали моя, яко зол душа моя исполнися, и живот мой аду приближися, и молюся, яко Иона: от тли Боже, возведи мя.

Наказание народу нашему, лестию от безбожных уловленному и жизни евангельския отступившему, волею приясте, безвиннии; жертву себе Господеви уготовисте в подобие жертвы Христовы, из глубины души вопиюще, блаженнии мученицы: от тли, Боже, возведи ны.

Алексие, священниче Селинский, Преображенскаго храма настоятелю, дерзновенно проповедал еси держатися Патриаршия Церкви, в нейже единой истина пребывает и сей не отвращатися во след раскольников новых. Сего ради изгнание претерпел еси от беззаконных, узником Соловецким совокупился еси, единеми усты с ними моляся: от тли, Боже, возведи ны.

Проходя путь узкий и прискорбный, Алексие священномучениче, врат тесных достигл еси Царствия в празднование славного Преображения Господня, молился бо еси выну ко Христу: от рова исления, Боже, возведи мя в гору святую Твою.

Богородичен: Егда постиже страну нашу година испытания, открывшася помышления сердец многих, на падение вечное неверных и на славу нескончаемую избранных, иже возлюбиша Крест Сына Твоего, Пречистая, и душу Свою уготовиша на пронзающее оружие. И ныне молим Тя: изведи от тли живот наш, якоже и оных помиловала еси.

Ин.

Измлада в служении церковном пребывал еси, священномучениче Георгие Доршевский, егда же прииде година великаго мятежа и богоборнаго гонения на Церковь Христову в земле Российстей, и чада века сего отвергались веры истинныя и преходили к безбожному зловерию, ты отвергл еси сумнительныя страхования, и прием на рамо благое иго священнаго служения, добре упасл еси стадо словесных овец, вверенных тебе десницею Божией.

Верный в малом, на большее призван был еси, священне Георгие, егда инокинь разоренной Зосимовой пустыни приял ко храмовому служению и духовному окормлению. Тем и ярость и рыкание звериное от ненавистников Церкви навлекл еси на себе, избранный Божий служителю.

За верность Христу и безпорочное служение Ему от безбожных в темницу ввержен быв, Георгие непобедиме, жестокие избиения претерпел еси, лжебратиями оклеветанный, язвы Господа на теле своем носить сподобился еси, и тако достигл еси вскоре и смерти за Христа, и славы безконечнаго Царствия Его.

Богородичен: Воспеваем Тя, Пресвятая Дево, и молимся усердно, да заступлением Твоим сподобимся милости Господней и прощения безчисленных грехов и прегрешений наших.

Кондак, гл. 5

Жертва Богу благоприятная, / благодатный начаток земли Клинския, / новомученицы и исповедницы ея, / празднующе днесь память вашу, / лобызаем за Христа приртыя раны и страдания, / восхваляем неколебимое в вере и правде стояние, / величаем и бесстрашное мук

смертных поправление, / и молимся прилежно: // умолите Господа о спасении душ наших.

Икос

О, святые мученицы преславнии! Молитвами вашими Церковь Русская утверждается, храмы Божии созидаются, леств бесовская и тьма идольская отгоняются, люди же безбожнии к покаянию обращаются и во умилении благодарственно взывают: радуйтесь, новомученицы и исповедницы края Клинского.

Песнь 7

Ирмос: Божия снисхождения огонь устыдися в Вавилоне иногда, сего ради отроцы в печи радованною ногою яко во цветнице ликующе, пояху: благословен еси Боже отец наших.

Новых мучеников Российских дружина добрая святые Клинстии, мужие и жены, монаси и священницы, простецы и премудрии, вернии послушницы явистесь Евангелия, обретосте бо души своя, погубивше их Христа ради, огненнаго искушения не отвергостесь, но очистившись, злату уподобистесь и воспевасте яко отроческими гласы: благословен еси, Боже отец наших.

Иерее блаженне Василие Спас-Коркодинский, смирением и терпением и непоколебимою верою силы вражия преобидел еси, изгнание и безместное пребывание, унижения, оклеветания и поношения приял еси, благословляя радостно Бога отец наших.

Егда приближися день славнаго отшествия твоего, священномучениче Василие, от непрестающего притеснения к свободе вечной чад Божиих, благодатию предвкусив уготованную ти славу, всем сердцем возопил еси: благословен еси, Боже отец наших.

Богородичен: Препетая, Пречистая Богоневесто Владычице, со святыми мученики Клинскими умоли Сына Твоего, да низпослет мир Отечеству нашему и душам нашим велию милость: да будем Ему чада верныя, благословляюще единими усты Бога отец наших.

Ин.

От юности отверглся еси мира, и безумных соблазнов исуетных мятежей его, богоразумный Гаврииле преподобномучениче, и посреде бед и гонений безбожных строителей рая земнаго, узким путем следования Христу потекл еси, верность ему превыше всякаго блага предъизбрав.

Пастырское служение восприял еси, преподобномучениче, яко послушание от Господа, правдой Божией зловерие и ложь суемудрых служителей тьмы безбожных обличая, овцы стада Церковнаго во истинней вере наставил еси, во еже последовати Христу даже до смерти, якоже древни мученицы, и жизнь свою слово сие исполнил еси.

Первое заключение в северном крае претерпев правды ради Христовой, вернулся еси ко церковному священнослужению, обаче по пришествии лютейшаго гонения от лукавых лжесвидетелей оклеветан быв, мученическою смертью Бога прославил еси, Гаврииле, преподобномучение всеблаженне.

Богородичен: Архангельское обрадование древле услышавши, Благодатная, умоли о нас сына Твоего, да пребудет с нам милость его вовеки, и да сподобит вечнаго радования Царствия Своего со всеми избранными Божиими.

Песнь 8

Ирмос: Седмерицею пещь, халдейский мучитель, богочестивым неистовно разжже, силою же лучшею, спасены сия виде, Творцу и Избавителю вопияше: отроцы благословите,

священницы воспойте, людие превозносите во вся веки.

Радостотворным благоуханием кровей ваших, пролитых за Христа, исполнили Отечество наше, новомученицы Клинстии, телеса же ваша, купно со тысящами и тьмами безвинно убиенных, во общих рвах погребенныя, яко святыя мощи от бесов избавление и от страстей свобожделение даруют нам, егда память вашу в соборе со всеми Бутовскими мученики совершаем. Сего ради Избавителю нашему поим: отроцы благословите, священницы воспойте, людие, превозносите Христа во веки.

Иныя не ведехом красоты и доброты, еже токмо жити нам о Господе вкупе, – плакашася сестры обители Акатовския, изгоняемыя и преследуемыя. Прощай же, драгая обители, отныне не услышиши зде гласа нашего: отроцы благословите, священницы воспойте, людие, превозносите Христа во веки.

Николиже тако бысть в земли Российстей, обаче грех ради наших претерпим вся, вне стен спасительных якоже внутрь суца, преидем служение наше Господеви, за люди Его умоляюща, – реша святыя инокини и послушницы, – и да воскликнем во отвержении

нашем: отроцы благословите, священницы
воспойте, людие, превозносите Христа во веки.

Богородичен: О Тебе возрадовашася,
Благодатная, инокини и послушницы, обители
Алекса́ндро-Невския иже во Акатове лишенные,
но Тобою не оставленныя и хранимыя, от них
Екатери́ну, Анастасию и Алекса́ндрю избранных
венцем преподобномучениц увенчала еси, всегда
хваливших, благословлявших и поклонявшихся
Господеви, и ныне поющих и присно
превозносящих Его во веки веков.

Ин.

От юности твоя в дому Божииизволил еси
приметатисямучениче Андре́е Воздви́женский,
чтением церковным яко хлебом насыщаяся и
пением божественных служб яко вином
наслаждаяся. Хором церковным умело
руководствуя, своя жизнь поприще десною
стезею шествовал еси, от трудов крестьянских
питаея и Бога благодаря в простоте сердца.
Ненавистниками всякия правды и
тьмодержителями века сего осужденный и
безвинно убиенный, заповедь блаженства
Евангельскаго исполнил еси.

Благолепию службы Божественней и
благостоянию святаго храма Божия посвятил

еси жизнь свою, наипаче стоянию в правде, блаженне мучениче Андрее. Вверженный же в пещь искушений смертных новаго Вавилона, вся до конца претерпел еси, дондеже удостоился орошения благодатию Духа во Царствии возлюбленного тобою Христа, Емуже пения небесныя с ангельскими вои присно воспеваеши.

Новомученицы святы, не всеу прешел путь тернисыйй вашего служения землю Клинскую, но в ней ли, вне ли ея скончали славное свое течение, во веки память ваша здесь совершается и чадами церковными чтится и прославляется.

Богородичен: Богородице и Мати Живота!
Призри на немощь нашу, и нищету духовную, и укрепи к правому хождению в заповедех Христовых спасительных, и отврати от лукаваго последования путей погибельных.

Песнь 9

Ирмос: Ужасеся о сем Небо, и земли удивишася концы, яко Бог явися человеком плотски, и чрево Твое бысть пространнейшее небес: тем Тя Богородицу, ангелов и человек чиноначалия величают.

Святити края Клинского, новии мученицы Христовы, ни смерть, ни живот, ни ангели, ни ина кая тварь не разлучиша вы от любве Божия. Такожде ни настоящая, ни грядущая, ни высота, ни глубина да не разлучат нас от любве вашей и заступничества пред Господем, вас бо присно величаем.

Ин мир ожидает нас, жительство уготованное избранным на небеси, идеже вы, святити новомученицы, в незаходимем свете пребываете. Умолите за ны Господа удостоитися части блаженнаго Царствия Его, да тамо ходатаев наших безмездных присно величаем.

Моления и молитвы многи на земли творили есте, богоноснии мученицы, во стяжание крепости душ ваших ко безбоязненному исповеданию веры Христовой. И ныне на небеси умолите Всемиловитваго Создателя всяческих, сподобити и нас доброты оныя душевныя и веры спасительныя сердечныя, да купно с вами присно Его величаем.

Богородичен: О, Преславная Мати, Богоневесто Владычице! Не отрини грешных молений наших, но предстательством святых мучеников края Клинского прими их милостивно и принеси

Сыну Твоему и Богу во спасение наше, да Тя, Богородицу, мы, недостойнии, присно величаем.

Ин.

Вас, святые священномученицы, пастырие Клинстии, Петре, Алексие, Иоанне, Георгие, Алексие, Василие, Алексие, Сергие и Петре, ныне прославляем, вспоминая труды и страдания ваша, и молим вас, непрестанно молитесь о нас, чадах ваших, да пребудем в вере спасительней, да исполнимся надежды несомненных, и да достигнем любви истинных, и да сподобимся внити в вечное Царствие Христово.

Вас, святые преподобномученицы Серафиме и Гаврииле, купно со Акатовскими преподобномученицами Александрою, Анастасиею и Екатериною, ныне ублажаем, и ты, мучениче Христов Андрее, купно со оными величаем радостно, и молимся вам: испросите нам от Господа дар истинного покаяния, смирения, терпения, Богу и ближним неленостного служения, чистоты и целомудрия, благодарного скорбей пренесения и всех добродетелей чистаго исполнения. Наипаче научите нас молитве внимательней и сердечней, да вашим стопам последуя, сподобимся десную часть спасаемых улучшить.

Святы новомученицы Клинстии, ведомии и неведомии, прославлении и Промыслом Божиим доньне сокровеннии! Не отлучайтесь от нас, чад ваших, но яко имущии велие дерзновение ко Господу, умолите избавитися нам от безумнаго служения пагубным страстем, исправити стопы наша к хождению во спасительных заповедях Евангельских, и помиловати нас, недостойных рабов Его.

Богородичен: О, Воеводо Возбранная! О, Сладчайшая Мати и всея вселенная упование! Услыши моление наше, от недостойных уст Тебе приносимое, и умоли Сына Твоего, непостижимом Советом Божиим воплотившагося от Тебе нашего ради спасения, да Ему Единому ведомыми путями приведет нас к покаянному исправлению жизни нашей и спасет души наша, молитвами святых новомучеников Клинских и Твоим всесильным предстательством.

Светилен, глас 8:

Светолития Божественнаго таинницы, сосуды избраннии благодати, соборную вашу память ныне празднующе, молимся усердно о еже просветитися сердцам нашим светом познания

Божия – сия бо есть жизнь вечная, страдания
вашими улученная.

**На хвалитех стихиры, праздника – 3 , и
новомученикам – 3, гл. 8,**

подобен «О преславнаго чудесе»:

О преславнаго чудесе! / Новомученицы
Клинстии / песнопеньми всехвальными /
прославляют днесь Отца Небеснаго / и молят
Вседержителя / о земном отечестве своем, / во
еже утвердити в нем Церковь Православную, /
разширити ю, умножити, умирити, / и
непреобориму адовы враты сохранить / до
скончания века, // и помиловати души наша.

О преславнаго чудесе! / Собезначальное Слово
Отчее, / Божий Сын Единородный, / днесь
милостивно приемлет новомучеников Клинских
молитву: / о, Иисусе Пречудный, / славословим
Твое безмерное благоутробие, / пощади и
помилуй град сей, / и люди Твоя в нем и окрест
сущия, / приведи их к покаянию / и
богоугодному жительству, // и души их спаси и
помилуй.

О преславнаго чудесе! / Новомученицы
Клинстии / молят Царя Небеснаго Утешителя, /
езде сущаго и вся исполняющаго: / о

вожденнейший Душе Истины, / прииди к
людem заблуждающим земли нашея, / и очисти
их от всякия скверны, / благодатию Твоею
просвети сердца их, / во еже знати Единого
Истинного Бога / и посланного Им Иисуса
Христа, // и спаси, Блаже, души их.

Слава, гл. 6.

Да отверзется дверь небесная днесь, / во еже
умно узрети преславное: / новомученицы
Клинтсии / прославляются вои небесными, / и
предстояще престолу Владычню, / воздевают
честныя своя руки, / умоляюще всеблагаго
Господа, / освятити благостию Своею души
наша // и помиловати нас.

И ныне, праздника.

НА ЛИТУРГИИ

Блаженна праздника на 4, и новомучеников, от
второго канона песнь 9, на 4.

Прокимен, Апостол, Аллилуарий, Евангелие,
Причастен - дне и новомучеников (см. службу
Собору новомучеников и исповедников
Российских).